

Na osnovu člana IV. B. 7. a) (IV) Ustava Federacije Bosne i Hercegovine, donosim

UKAZ

O PROGLAŠENJU ZAKONA O KONTROLI PREDMETA OD PLEMENITIH METALA

Prolašava se Zakon o kontroli predmeta od plemenitih metala koji je donio Parlament Federacije Bosne i Hercegovine na sjednici Predstavničkog doma od 7. septembra 2004. godine i na sjednici Doma naroda od 14. septembra 2004. godine.

Broj 01-1070/04
16. decembra 2004. godine
Sarajevo

Predsjednik
Niko Lozančić, s. r.

ZAKON

O KONTROLI PREDMETA OD PLEMENITIH METALA

I - OPĆE ODREDBE

Član 1.

Ovaj zakon se odnosi na tehničke zahtjeve, koje moraju ispunjavati predmeti od plemenitih metala (u daljem tekstu: predmeti), postupke ispitivanja i potvrđivanja usklađenosti predmeta, promet predmeta i nadzor nad predmetima.

Neposrednu kontrolu predmeta od plemenitih metala vrši Zavod za mjeriteljstvo Federacije Bosne i Hercegovine (u daljem tekstu: Zavod).

Član 2.

Predmeti od plemenitih metala, mogu se stavljati u promet samo ako zadovoljavaju propisane tehničke zahtjeve i ako su ispitani i označeni u skladu sa ovim zakonom.

Član 3.

Termini i definicije koji se koriste u ovom zakonu imaju sljedeće značenje:

1. *plemeniti metali* su: platina, zlato, paladij i srebro;
2. *slitina plemenitih metala* je čvrsta homogena smjesa plemenitog metala i jednog ili više drugih metala;
3. *predmet od plemenitog metala* je nakit, roba zlatara ili kujundžije ili časovničara i bilo koji drugi predmet napravljen cjelovito ili djelimično od plemenitog metala;

4. *predmet koji je sastavljen od različitih plemenitih metala* je nakit, roba zlatara ili kujundžije ili časovničara i bilo koji drugi predmet napravljen cjelovito ili djelimično od različitih plemenitih metala;
5. *miješani predmet* je predmet koji uključuje dijelove od plemenitog metala i dijelove od drugih metala ili drugih materija;
6. *mali predmeti* od plemenitih metala su predmeti izrađeni od zlata ili platine mase manje od 1 g ili predmeti izrađeni od srebra ili paladija mase manje od 3 g;
7. *standardni stepen finoće* je najniži sadržaj čistog plemenitog metala, izražen u dijelovima na hiljadu (X/1000), u odnosu na ukupnu masu slitine;
8. *oznaka stepena finoće* je oznaka koja pokazuje stepen finoće predmeta od plemenitog metala i ima propisan sadržaj, oblik i dimenzije;
9. *prevlaka od plemenitog metala* je prevlaka nanosena na cijeli ili dio predmeta hemijskim, elektrohemijskim, mehaničkim ili fizičkim postupkom;
10. *proizvođači predmeta od plemenitih metala* su sva pravna ili fizička lica, registrirana kod nadležnog organa za obavljanje djelatnosti proizvodnje predmeta od plemenitih metala;
11. *uvoznici predmeta od plemenitih metala* su sva pravna lica registrirana kod nadležnog organa za obavljanje djelatnosti uvoza, kao i zastupanja stranih proizvođača predmeta od plemenitih metala;
12. *dobavljač* je organizacija koja snabdijeva proizvodima korisnika i može biti proizvođač, proizvođačev zastupnik ili uvoznik;
13. *žigovanje predmeta od plemenitih metala* je potvrđivanje usaglašenosti ispitnog predmeta, u pogledu stepena finoće i oznaka sa odredbama ovog zakona, žigom za označavanje stepena finoće predmeta od plemenitog metala (u daljem tekstu: žig);
14. *znak proizvođača, odnosno znak uvoznika predmeta od plemenitog metala* je znak odobren od nadležne institucije za mjeriteljstvo u Federaciji Bosne i Hercegovine, propisanog sadržaja, oblika i dimenzija kojim proizvođač, odnosno uvoznik označava predmete od plemenitih metala;
15. *ispitivanje predmeta od plemenitih metala* je niz postupaka koje obavezno čine: identifikacija predmeta od plemenitih metala, vizuelni pregled stanja predmeta i propisanih oznaka na njemu i određivanje stepena finoće propisanim metodama i opremom za ispitivanje;
16. *označavanje predmeta od plemenitih metala* je utiskivanje odobrenog znaka proizvođača i pripadajuće oznake finoće.
17. *Institut i Savjet* predstavljaju instituciju i organ u Bosni i Hercegovini prema Zakonu o mjeriteljstvu Bosne i Hercegovine ("Službeni glasnik BiH" broj 19/01).

Član 4.

Odredbama ovog zakona ne podliježu:

1. aparati i instrumenti koji služe za zdravstvene namjene, te aparati i instrumenti koji služe za istraživačke namjene;
2. polu-proizvodi od plemenitih metala, koji su namjenjeni za zubno-protetske predmete;
3. predmeti za znanstvene i tehničke namjene;

4. predmeti od plemenitih metala koji su potpuno prevučeni emajlom, dragim kamenom, biserom ili drugim sličnim predmetima;
5. predmeti od metala prevučeni plemenitim metalom;
6. muzički instrumenti ili dijelovi takvih instrumenata napravljeni od plemenitih metala;
7. predmeti od plemenitih metala starije proizvodnje koji imaju naučnu, historijsku ili kulturnu vrijednost;
8. negve na dragom kamenu, biseru ili drugom predmetu kod kojih je masa plemenitog metala neznatna;
9. zakonsko sredstvo plaćanja, novčići kolekcionara i medalje, koje su napravljene od plemenitih metala i predmeti u vlasništvu pojedinca;
10. ingoti i granule od plemenitih metala koji se upotrebljavaju u bankarskom prometu.

II - TEHNIČKI ZAHTJEVI

Član 5

Predmeti od plemenitih metala moraju imati sljedeće stepene finoće:

1. predmeti od zlata
999 hiljaditih (999/1000)
990 hiljaditih (990/1000)
916 hiljaditih (916/1000)
840 hiljaditih (840/1000)
750 hiljaditih (750/1000)
585 hiljaditih (585/1000)
500 hiljaditih (500/1000)
2. predmeti od platine
999 hiljaditih (999/1000)
950 hiljaditih (950/1000)
3. predmeti od srebra
999 hiljaditih (999/1000)
950 hiljaditih (950/1000)
925 hiljaditih (925/1000)
800 hiljaditih (800/1000)
4. predmeti od paladija
999 hiljaditih (999/1000)
950 hiljaditih (950/1000)
500 hiljaditih (500/1000)

Član 6.

Predmeti od zlata čiji je stepen finoće niži od 500 hiljaditih (500/1000), predmeti od platine čiji je stepen finoće niži od 950 hiljaditih (950/1000), predmeti od srebra čiji je stepen finoće niži od 800 hiljaditih (800/1000) i predmeti od paladija čiji je stepen finoće niži od 500 hiljaditih (500/1000), nisu predmeti od plemenitih metala u smislu ovog zakona i ne mogu se stavljati u promet.

Član 7.

Predmeti od plemenitog metala koji imaju finoću veću od finoće propisane za određeni stepen u članu 5. ovog zakona, a manju od narednog višeg stepena, smatraju se predmetima koji imaju čistoću tog određenog manjeg stepena.

Član 8.

Predmet od plemenitog metala sa prevlakom od drugog plemenitog metala smatra se predmetom od plemenitog metala od kojeg je predmet izrađen.

Član 9.

Predmeti od plemenitih metala koji su izrađeni od zlata, srebra, platine i paladija i imaju stepen finoće 999/1000 mogu se staviti u promet samo radi dalje prerade.

Na predmet iz stava 1. ovog člana utiskuje se oznaka 999.

Član 10.

Plemeniti metali kod predmeta trebaju biti zalemljeni upotrebom slitine koja ima isti stepen finoće i koja je od istog plemenitog metala kao ostali dio predmeta, gdje to tehnički nije moguće, lemljenje se može uraditi sa legurom nižeg stepena finoće ili drugim materijalom.

Član 11.

Dijelovi predmeta napravljeni od neplemenitog metala moraju biti lahko prepoznatljivi ili jasno odvojeni od plemenitih metala.

III - ISPITIVANJA I POTVRĐIVANJE USKLAĐENOSTI PREDMETA OD PLEMENITIH METALA

Član 12.

Proizvođač mora predmet, prije stavljanja u promet, označiti svojim odobrenim znakom.

Predmete stranih proizvođača mora označiti svojim znakom proizvođačev zastupnik odnosno uvoznik sa sjedištem u Bosni i Hercegovini, bez obzira da li je predmet označen znakom stranog proizvođača.

U Institutu se vodi registar znakova dobavljača u Bosni i Hercegovini. Kopije rješenja znaka proizvođača dostavljaju se Zavodu. U navedenom registru identificira se dobavljač i datum registracije znaka.

Član 13.

Predmeti od plemenitih metala, prije stavljanja u promet u Federaciji Bosne i Hercegovine, podliježu obaveznom ispitivanju i potvrđivanju usklađenosti prema odredbama ovog zakona.

Prije stavljanja u promet, dobavljač mora označiti predmet i oznakom stepena finoće, dostaviti ga Zavodu radi ispitivanja i potvrđivanja usklađenosti predmeta sa propisanim tehničkim zahtjevima, označavanjem predmeta sa žigom odgovarajućeg stepena finoće (u daljem tekstu: žig)

Član 14.

U zahtjevu za ispitivanje usklađenosti predmeta sa propisanim tehničkim zahtjevima i za njihovo označavanje sa žigom, dobavljač mora navesti broj predmeta, njihovu ukupnu masu, stepen finoće i sastav slitine na propisanom obrascu, a za uvezene predmete priložiti i uvoznu carinsku deklaraciju.

Član 15.

Predmeti od plemenitih metala mogu se ispitivati i žigosati u imenovanoj laboratoriji Centra za verifikaciju mjerila, kontrolu plemenitih metala i nadzor, koji je u sastavu Zavoda ili u drugim imenovanim laboratorijama.

Direktor Instituta, uz konsultacije sa Savjetom, propisuje zahtjeve koje laboratorije i Centri moraju ispuniti i uz saglasnost Savjeta imenuje laboratorije u skladu sa čl. 15. i 16. Zakona o mjeriteljstvu Bosne i Hercegovine ("Službeni glasnik BiH", broj 19/01).

Član 16.

Ako Zavod pri ispitivanju utvrdi da dostavljeni predmet ima znak dobavljača i oznaku stepena finoće na predmetu, i da ispunjava propisane tehničke zahtjeve, označit će ga svojim žigom.

Ako Zavod pri ispitivanju utvrdi da dostavljeni predmet nema znak dobavljača i oznaku stepena finoće ili ne ispunjava druge tehničke zahtjeve, uskratit će označavanje žigom i o tome donijeti rješenje.

Član 17.

Ako stranka nije zadovoljna nalazom ispitivanja, može u roku od petnaest dana od dana dobijenog saopštenja podnijeti zahtjev direktoru Instituta da se izvrši ponovno ispitivanje.

Direktor Instituta će za izvođenje ispitivanja odrediti odgovarajuću instituciju, čiji je nalaz konačan.

Član 18.

Predmeti koji su prerađeni, moraju ponovo biti označeni znakom dobavljača i oznakom finoće te dostavljeni na ispitivanje i označavanje žigom.

Zabranjeno je prenošenje utisnutog žiga na drugi predmet od plemenitog metala.

Nakon što je predmet označen žigom, predmetu se ne smiju dodavati druga strana tijela, koja se ne mogu jasno vidjeti i raspoznati.

Član 19.

Predmeti koji su sastavljeni od različitih plemenitih metala moraju, izuzev u slučaju malih predmeta, nositi odgovarajući oznaku finoće na svakom dijelu.

Član 20.

Mješani predmeti moraju, izuzev u slučaju malih predmeta, nositi odgovarajuću oznaku finoće na dijelu od plemenitog metala ili plemenitih metala.

Član 21.

Predmeti, koji imaju prevlaku od drugih metala, moraju imati oznaku finoće plemenitog metala od kojeg su napravljeni. Takvi predmeti moraju biti praćeni dokumentom koji daje prikaz tipa prevlake.

Na zahtjev proizvođača predmeta, Zavod i druge imenovane laboratorije utvrđuju da li su ispunjeni uvjeti iz stava 1. ovog člana.

Član 22.

Troškove ispitivanja i naknada označavanja žigom predmeta snosi podnosilac zahtjeva.

Direktor Zavoda posebnim propisom, uz saglasnost direktora Instituta, utvrđuje visinu i način plaćanja troškova i naknada iz stava 1. ovog člana.

Član 23.

Odredbe ovog zakona koje se odnose na označavanje predmeta znakom dobavljača, oznakom finoće i žigom odgovarajućeg stepena finoće, ne odnose se na:

- predmete koji su suviše lomljivi i na koje je teško utisnuti navedene oznake,
- one dijelove predmeta, sastavljenih od različitih plemenitih metala, na koje je iz tehničkih razloga teško utisnuti navedene oznake,
- polu-proizvode od plemenitih metala.

Za predmete iz stava 1. ovog člana imenovana laboratorija će izdati certifikat usklađenosti koji treba da sadrži sljedeće:

- ime i adresu dobavljača,
- opis predmeta,
- stepen finoće u dijelovima na hiljadu datog plemenitog metala ili datih plemenitih metala.

IV - STAVLJANJE U PROMET

Član 24.

Predmete od plemenitih metala dozvoljeno je stavljati u promet u Federaciji Bosne i Hercegovine samo ako imaju stepen finoće koji odgovara tehničkim zahtjevima propisanim ovim zakonom.

Član 25.

Prije stavljanja u promet u Federaciji Bosne i Hercegovine predmeti od plemenitih metala moraju biti označeni znakom proizvođača i oznakom finoće te ispitani i označeni žigom odgovarajućeg stepena finoće.

Član 26.

Predmeti od plemenitih metala namjenjeni izvozu iz Federacije Bosne i Hercegovine moraju biti označeni oznakom finoće.

Predmeti iz stava 1. ovog člana označit će se znakom proizvođača i ispitati i žigosati prema odredbama ovog zakona, samo ako to zahtijeva izvoznik ili strani kupac.

Troškove iz stava 2. ovog člana snosi izvoznik ili strani kupac, odnosno podnosilac zahtjeva.

Član 27.

U prodajnim prostorijama predmeti od plemenitih metala moraju biti posebno označeni i odvojeni od druge robe.

U prodajnim prostorijama u kojima se prodaju predmeti od plemenitih metala, moraju biti istaknute na vidnom mjestu slike žigova, kao i pregled stepena finoće plemenitih metala iz člana 7. ovog zakona. Kupcu se treba obezbijediti povećalo kojim može jasno vidjeti i razaznati žigove na predmetima od plemenitih metala.

U svojim prodajnim prostorijama dobavljači predmeta od plemenitih metala moraju na vidnom mjestu držati i rješenje o znaku proizvođača, odnosno o znaku uvoznika.

V - NADZOR I UPRAVNE MJERE

Član 28.

Nadzor nad provođenjem ovog zakona i propisa donesenih za njegovo provođenje u Federaciji Bosne i Hercegovine vrši Zavod i nadležna tržišna inspekcija.

U vršenju nadzora iz stava 1. ovog člana organi nadležne tržišne inspekcije poduzimaju mjere, za koje su ovlašteni ovim zakonom i propisima tržišne inspekcije.

Član 29.

Ako tržišni inspektor utvrdi da predmet od plemenitih metala koji je u prometu nije označen žigom, a prema odredbama ovog zakona mora biti označen žigom, donijet će rješenje kojim će zabraniti prodaju tog predmeta. Jedan primjerak tog rješenja inspektor će dostaviti Zavodu.

Protiv rješenja inspektora može se izjaviti žalba federalnom ministru energije, rudarstva i industrije u roku od 8 dana po prijemu prvostepenog rješenja.

Predmet za koji je doneseno rješenje iz stava 1. ovog zakona, mora se odmah povući iz prometa, zapečatiti na pogodan način od strane tržišnog inspektora i ne smije se stavljati u promet dok ne bude označen žigom. Na označavanje žigom taj predmet se mora donijeti u omotu koji je zapečaćen od strane tržišnog inspektora.

Žalba protiv rješenja iz stava 1. ovog člana ne odlaže izvršenje rješenja.

Član 30.

Nadzor nad ispravnošću, označavanjem znakom proizvođača i žigom odgovarajućeg stepena finoće predmeta od plemenitih metala u prometu i nadzor nad održavanjem propisanih uvjeta u prostorijama

kod proizvođača, odnosno uvoznika predmeta od plemenitih metala kome je izdato rješenje o znaku proizvođača/uvoznika ili kod dobavljača kojima je izdato rješenje o ispunjavanju uvjeta za ispitivanje i žigosanje predmeta u njegovim radnim prostorijama, obavlja Zavod uz uključenje eksperata Instituta ako je to potrebno.

Prilikom obavljanja nadzora iz stava 1. ovog člana ovlašteni djelatnici Instituta i Zavoda imaju pravo da ulaze u prostorije u kojima se predmeti proizvode, stavljaju u promet, ili drže pripremljeni radi stavljanja u promet.

Privredna društva i druga pravna lica koja proizvode ili stavljaju u promet predmete, kao i samostalni privrednici, u čijim prostorijama se obavlja nadzor iz stava 1. ovog člana, dužni su ovlaštenom licu Zavoda, odnosno Instituta omogućiti nesmetano obavljanje nadzora, odnosno kontrolu žigova na predmetima koji se stavljaju u promet, ili se drže pripremljeni radi stavljanja u promet ili su izloženi kao uzorci, i pružiti sve podatke koji su za to potrebni.

Ovlašteni djelatnik Zavoda koji obavlja nadzor obavezan je sastaviti zapisnik i u njemu navesti činjenično stanje utvrđeno prilikom obavljanja nadzora iz stava 1. ovog člana.

Ako se prilikom obavljanja nadzora iz stava 1. ovog člana utvrdi da proizvođač, odnosno uvoznik predmeta od plemenitih metala, ne ispunjava uvjete propisane ovim zakonom, Zavod će donijeti rješenje o ukidanju rješenja o znaku proizvođača/uvoznika, odnosno rješenje da se predmeti od plemenitih metala mogu ispitati i žigosati u radnim prostorijama proizvođača, odnosno uvoznika.

Ako se prilikom obavljanja nadzora iz stava 1. ovog člana utvrdi da predmet koji je stavljen u promet, ili se drži pripremljen radi stavljanja u promet, ili je izložen kao uzorak, nije označen odgovarajućim žigom, a po odredbama ovog zakona podliježe ispitivanju i označavanju žigom, donijet će se rješenje o zabrani prodaje tog predmeta.

Predmet za koji je doneseno rješenje iz stava 5. ovog člana mora se odmah povući iz prometa. Zavod će na prikladan način obezbijediti povlačenje tog predmeta iz prometa.

Protiv rješenja iz stava 4. ovog člana i protiv rješenja iz stava 5. ovog člana može se podnijeti žalba federalnom ministru energije, rudarstva i industrije.

Žalba izjavljena protiv rješenja iz stava 4. ovog člana i žalba izjavljena protiv rješenja iz stava 5. ovog člana ne odlaže izvršenje rješenja.

Član 31.

Institut vrši nadzor nad ispunjavanjem obaveza imenovanih laboratorija, centara i drugih pravnih lica iz člana 15. ovog zakona.

Ako Institut utvrdi da imenovana laboratorija ne radi u skladu sa propisima ili da ne ispunjava više propisanih zahtjeva, donijet će rješenje o prestanku važenja rješenja iz člana 15. stav 2. ovog zakona.

Član 32.

Ovlaštenom djelatniku Zavoda koji radi na poslovima kontrole ispravnosti i na nadzoru ispravnosti i označavanjem žigom predmeta u prometu izdaje se službena legitimacija.

Direktor Zavoda uz konsultaciju sa direktorom Instituta propisuje sadržaj i oblik legitimacije iz stava 1. ovog člana i vođenje evidencije o izdatim službenim legitimacijama.

VI - KAZNENE ODREDBE

Član 33.

Novčanom kaznom od 2.000,00 KM do 20.000,00 KM kaznit će se za privredni prijestup privredno društvo ili drugo pravno lice:

1. ako prenese utisnuti žig na drugi predmet od plemenitih metala (član 18. stav 2.),
2. ako stavi u promet predmete od plemenitih metala koji ne odgovaraju tehničkim zahtjevima u pogledu finoće (član 24.),
3. ako stavi u promet predmete od plemenitih metala koji nisu na propisan način označeni, ispitani i žigosani (član 25.),
4. ako stavi u promet predmete od plemenitih metala za koje je doneseno rješenje o zabrani prodaje (član 29. stav 1. i član 30. stav 4.).

Za privredni prijestup iz stava 1. ovog člana kaznit će se i odgovorno lice u privrednom društvu ili drugom pravnom licu novčanom kaznom u iznosu od 120,00 KM do 1.200,00 KM.

Član 34.

Novčanom kaznom u iznosu od 600,00 KM do 10.000,00 KM kaznit će se za prekršaj privredno društvo ili drugo pravno lice:

1. ako ne donese na ispitivanje i žigosanje predmete koji su doradjeni ili prerađeni (član 18. stav 1.),
2. ako u trgovini ne drži predmete od plemenitih metala odvojeno od ostalih predmeta (član 27. stav 1.),
3. ako ne stavi na raspolaganje slike žigova za označavanje stepena finoće predmeta od plemenitih metala ili sredstva kojima se ti žigovi i znakovi mogu raspoznati (član 27. stav 2.),
4. ako ne dozvoli ili ometa vršenje nadzora (član 30. st. 2. i 3.).

Za prekršaj iz stava 1. ovog člana kaznit će se i odgovorno lice u privrednom društvu ili drugom pravnom licu novčanom kaznom u iznosu od 500,00 KM do 5.000,00 KM.

Član 35.

Novčanom kaznom od 500,00 KM do 5.000,00 KM kaznit će se za prekršaj lice koje samostalno obavlja privrednu djelatnost ako učini koju od radnji iz člana 33. ovog zakona.

Novčanom kaznom od 300,00 KM do 1.000,00 KM kaznit će se za prekršaj lice koje samostalno obavlja privrednu djelatnost ako učini koju od radnji iz člana 34. ovog zakona.

Ako lice koje samostalno obavlja privrednu djelatnost učini u povratu povrede iz čl. 33. ili 34. ovog zakona, izrećiće mu se zaštitna mjera zabrane obavljanja djelatnosti u trajanju do šest mjeseci za prvi povrat, a u slučaju višestrukog povrata zaštitna mjera trajne zabrane obavljanja djelatnosti.

VII PRIJELAZNE I ZAVRŠNE ODREDBE

Član 36.

Propisi za sprovedbu odredaba ovog zakona o:

- tehničkim uvjetima koje u pogledu izrade moraju ispunjavati predmeti od plemenitih metala;
- obliku znaka proizvođača i njegovog zastupnika;
- obliku i načinu utiskivanja i načinu dodjeljivanja znaka proizvođaču i njegovom zastupniku;
- uvjetima koje u pogledu opreme i radnih prostorija moraju ispunjavati dobavljači predmeta od plemenitih metala za dobijanje znaka proizvođača odnosno znaka uvoznika;
- oblicima stepena finoće, oblicima žiga odgovarajućeg stepena finoće te način ispitivanja i označavanja predmeta od plemenitih metala;

donose se saglasno odredbama Zakona o mjeriteljstvu Bosne i Hercegovine uz konsultacije sa direktorom Zavoda.

Član 37.

Danom stupanja na snagu ovog zakona prestaje primjena Zakona o kontroli predmeta od plemenitih metala ("Službeni list R BiH", broj 2/92, 3/93 i 13/94).

Do donošenja propisa kojima se obezbjeđuje izvršenje ovog zakona, primjenjivat će se odgovarajući BiH i savezni podzakonski akti koji su se primjenjivali za provođenje zakona iz stava 1. ovog zakona. Postupci pokrenuti a koji nisu okončani do dana stupanja na snagu ovog zakona završit će se po odredbama ovog zakona

Član 38.

Predmeti od plemenitih metala ispitani i označeni žigom prije stupanja na snagu ovog zakona ne podliježu ponovnom ispitivanju i žigosanju.

Član 39.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući
Doma naroda
Parlamenta Federacije BiH
Slavko Matić, s. r.

Predsjedavajući
Predstavničkog doma
Parlamenta Federacije BiH
Muhamed Ibrahimović, s. r.